
GUILLAUME DE BÉZIERS.

ERRANSA,
Pezansa,
Me destrenh, e m balansa;
Res no sai on me lansa
Esmansa,
Semblansa
Me tolh ir' e m'enansa;
E m dona alegransa
Un messatgier, que me venc l'autre dia,
Tot en vellan, mon verai cor emblar;
Et anc pueisas no fuy ses gelozia,
E res no sai vas on lo m'an sercar.
Cum fis amaire
Murray ses cor vaire,
Ab sol qu'el sieu laire
No m sia fals ni var:
Qu'aissi o deu faire
Tot drut de bon aire;
Per que m'es veiyre
Que ben o deya far.
Per merce us prec, bella dousset' amia,
Si cum ie us am, vos me vulhatz amar;
Quar ie us am mais que nulha res que sia,
Et anc no us vi, mas auzit n'ai parlar.

Als no sai dire ,
Mas dat m'avetz cossire
Tal, don planc e sospire :
No puesc esser jauzire
Tro veyà rire
Vos don ieu suy servire ;
Aculhetz me, no us tire,
Quar trop sai del dezire
Que cre que m vol aucire.